

"Ossenbühl Linnwe"

En paar pläsierliche Stöckskes üt et Hönxer Wold

Ossenbühls Bennad — en jeden Bur kennt öm. Hei wor en kleinen Kötter, bo wen in't Hönxer Wold, nich wit van Meeßen Henn af. Sin Vater wor noch Dage löhner on ging en en Bosch op Holt för'n Pött. En Stall voll Blagen hatt hei o alles Jonges. Sin Frau kom van en ander Sort. Dor woren söwen Dennes on ee Jong. Den Ollen van Ossenbühls Moder, wat Bennad sin Beßvater wor, sach öm mer: „Eck hew söwen Blagen on een Kend.“ Awer nou wellt wej doch manges va Ossenbühls Bennad anfangen.

Wie Ossenbühls Bennad to sin Naam kom

As Ossenbühls Bennad geboren woren, woren grad de Kaschen ripp. Wen Jan, wat sin Vater wor, nou noch en Naam wöß för dat Wörmken! Jan, Welm Derk — ach, hei hadd alle Vaders, Grotvaders on Ohmes dör. As hei noch so an semmelieren wor, sog hei dör't Glasfenster en Jöngsken op denn groten Knapp kaschenboom setten. „Donderkiel“, dach hei, „ock dat Mallör nou!“ Dör't Fenster onder denn Boom, dat Jöngsken geschnapp, wor mer en Moment. Hei dach al et wor de eenen van de Sinnen geweß. Dor hadd hei en Weldfremden an de Bocks. „Wie hitts dou? Eck well dej bej denn Schandarm anzeigen.“ „Tenbrenk Bennad“, schnaseln dat Jöngsken. „Bennad?“ sach Ossenbühls Jan, „denn hew eck noch nich. Jöngsken, loop on lot dej nich mehr hier sihn!“ Dat Jöngsken mied seck dedör, on denn Twelften van de Ossenbühls hatt sinnen Naam.

Die twelf Mohren

Bej Ossenbühls hadden se noch denn ollen Busen (offener Kamin), denn Kamin en de Köck. Bennad wor met sinne Brürs alleen te Hus. Dor geng et dör Köck on Kamer, in denn Beddekaß on in den Poggenstall, dat das ganze Hus bold önder te bowen stunn. Et wor en welde Jach. Dor klatern Bennad ok noch op denn Herd in denn Busen, denn Schornstin hoch, on de ganze welde Meute drachterher. Bowen kommen se dann schon schwatt herüt. Ssst, dat Dack heronder, met de Kond on en Heihoop, dör't Fenster herrin, wer on denn Herd on noch es dör denn Schornstin. Dat soch en Spaziergänger, wie de kleinen Mohren dor herüt kome enen no denn anden. „So ist es recht. Tut Ihr Eurer Mutter nur den Kamin fegen!“ Nou ging et es rechteg dran. Herop dör denn Kammin, sst, dat Dack heronder on denn Heihoop on wer dör't Fenster. Dor sot Bennad grad op et Dack



as Papp on Mamm herop komen. Ssst, op den Heihoop, dör de Hech on herinn en de Bäk, on alle andern Mohren drachter rin. Oowes müssen sej jo nou doch nou Hus. Dor gow et langen Hawer on kennen Bukweiten-Pannekuk.

Bennad kömp in de School

Bennad wassen op met de Poggen on de Huhnder, ömmer in denn Elften sinne Bocks herinn, wenn denn grad herüt gewassen wor. Wenn hei sej dann ütrock, dögen sej grad noch för en Putzklöngel. En ganz Pozschon Ossenbühls haddense all dörgeschuert on ingeretten, eh dat hei se an de Kond kreech.

Met seß Jahr kom hei en de School. Denn Scholmeister schreew öm op de Tafel: „Werter Herr Ossenbühl, geben Sie Ihrem Kind doch ein Taschentuch mit zur Schule!“ As denn Ollen dat geläsen hadd, schreew hei retour: „Werter Herrn Lehrer“, schreew hei, „meine Kinder brauchen keine Taschendäukers, die schnäutern sich in die Fingers.“


De Babelkes

Tante Rika üt Denslaken wor op Moder öhren Gebottsdach gekommen on hadd denn Jöngsten en Tut met Babelkes metgebracht. En halwe Stond later hadd Bennad se all op. „Bernhard“, säd Tante Rika, „du hast doch die Klüntgen nich all auf eins gegessen?“ Säd Bennad: „Nich op enns, awer achter enander.“

Bennad schmeert sinnen Bur an

Eenmol wor Ossenbühls Bennad en Spellen op en Hoff. Dor gönnen öm de Bur nich den Koß van de Stutt. Owes soten sej achtern Pannekuk. Twee Stöckskes

woren noch op den groten bonten Pannekukenschöttel; dat een dovon met en gro Stock Speck stunn vör Bennad, dat andre ohne Speck vör denn Bur.



„Ei“, dach denn Bur, „wu mak eck dat?“ — „En schöne Schöttel“, säch hei on dräjen öhr langsam dorbej heröm on bekek sej sech. „Nä“, alles wat räch es, et es enn schöne Schöttel!“ Dou hadd hei denn Speckhaas op sinne Sitt. „Donder ook“, dach Bennad, „dou Neckel!“ — „Jo, jo“, säch hei on draijen de Schöttel noch es rond, „kann ok gut en Daler wert sinn.“

Dor hadd hei denn Speckhaas wer op sinne Sitt.


De Bur schmeert Bennad an

In Sommerdach stok Bennad de Hawer. Et wor en drocke Tid in't Heuj. Dor flog en Spatz för öm op. „Kik es, Bur“, sät hei, „dor flöch en Storch.“ „Nä“, sät den Buur, „dat es en Spatz!“ Bennad sät: „Wenns dou nich foddess säs, dat et en Storch es, dann du eck necks mehr!“ Denkt denn Bur: Eck hepp noch lang kenn anden Knech on sät: „Jo, et es en Storch, mer en kleinen.“

Wenterdach. Dat Daschen wor gedon. Arbeit wor nich mehr so räch. Geschläch hadd hei ok noch nich, dor sät denn Bur: „Boooh, Bennad, kik es, wat Speck!“ on wiesen op de Katuffeln. „Nä“, sät Bennad, „dat es kenn Speck, dat sönd Katuffeln!“ Sät denn Bur: „Wenns dou nich foddess säs, dat et Speck es, kasse gohn!“ „Verdammt“, sät Bennad, „jo, et es Speck, awer mager!“

Bennad hät ok gefrejt

Et este Mol ging et donewen. Se soot öm gegenöwer on hei treiejen öhr ömmer sachten op denn Fut. „Merkese et?“ Die Denn sach necks. Hei noch ens op denn Fut. „Merkese 't jetzt?“ Die Denn sack ömmer noch necks. Nou noch es, met en betjen mehr Gefühl. Dor wödd et de Denn doch te domm. Se schleet öm medden en 't Gesech. „Merks dou et jetzt?“



Wie Bennad sin Erwdeel utbetahlt kreeg

Bennad wor te Hus. Moder wor all dot. Bennad on denn Ollen woren an't Daschen met denn Flägel. Bennad hadd kenn Senn dran, te Hus te bliewen. „Papp“, sät Bennad, „gew mej Moder öhr Deel on lot mej gohn!“ Jan mik seck denn Riem van de Bocks, lack sech denn groten Jong öwer't Knie on trock öm en paar met denn Riem öwer de Kond. „So“, sät Papp, „dat wor Moder öhr Deel. Wennse min ok noch weiß, kasse et foddess metkriegen.“ „Nä“, sät Bennad, „lot ons mer wier daschen!“

Woröm denn Pastur bej Bennad nich mehr opp't Hüsken mott

Emol wor'n Pastur bej Bennad. Gut, dat Drüken noch watt Koffi ent Hüs hadd. Schnaps dronk denn doch nich bej annere Lüj. As denn Pastor Bennad es fragen, wor dat Hüsken wör (hei muß nämlick es ütt de Bocks), sät Bennad: „Herr Pastor, wej hepp kenn Hüsken, wej goht opp en Meß.“

Bennad kömp met de Wessenschaf in Konflek

Bennad sinnen Öllsten wödd Bur. Hei geht ock bei Paust opp de Ossenschool. Wie hei nou es no Hüs kömp, sät hei vör sin Vader: „Papp, wej mött mehr Kalk strauen, Kalk fördert dat Bakterienleben.“ „Watt,“ sät Bennad, „wat fördert dat?“ „Bakterienleben“, sät sinnen Jong. „Wat es dat?“ „Dat sönd kleine Dieren in denn Grond.“ Dou wödden denn Ollen awer falsch: „Sönd die dann ganz varrück gewodden op de Ossenschool! Hepp wej dann noch nich genug Kaneckels in et Land?“

Wie de Amis komen

Mett den Öwergang sot Bennad met sinne Frau on sinne Blagen in denn Kelder. Buten woor en Geschiet on en Geknatter, dat Drüken et mett de Nerven kreeck. Dann wor't met enns stell. As Bennad heropp kum, stunn en Ami för öm un sät: „Hew you melk?“ „Komm heropp, Drüken“, röpp Bennad, „et sönd de Onsen, se spreken platt.“